

Visoki predstavnik pozvao političke stranke da nastave proces započet na Vlašiću

Visoki predstavnik Paddy Ashdown izrazio je razočarenje činjenicom da današnji sastanak političkih stranaka o restrukturiranju policije nije rezultirao jasnim i konkretnim pomacima, zato što neke od pozvanih stranaka nisu prisustvovala sastanku. Cilj ovog sastanka, kojim su zajednički predsjedavali visoki predstavnik i premijer BiH Adnan Terzić, bio je da se omogući nastavak procesa započetog na Vlašiću kako bi se osigurao politički sporazum o restrukturiranju policije u prvoj polovini septembra.

Stranke koje su prisustvovala sastanku dogovorile su se da podrže uspostavu radne grupe na nivou vlade koja će izraditi prijedlog koji će biti temelj za dalje pregovore između političkih stranaka. Pod uslovom da se u tome uspije, početkom septembra organizirat će se sastanak u cilju postizanja političkog sporazuma o restrukturiranju policije koji bi, zatim, bio proslijeđen parlamentima na usvajanje.

Kada se konačno formira, radna grupa će svoj rad usredsrediti na pitanja o kojima se nije formalno raspravljalo na Vlašiću, a posebno na uslov Evropske unije da regionalne policijske oblasti moraju biti zasnovane na principu funkcionalnosti a ne politike.

Međutim, visoki predstavnik je izjavio da radna grupa neće moći početi sa radom sve dok one stranke koje se nisu pojavile na današnjem sastanku, odnosno SDS, SNSD i DNS, eksplicitno ne podrže ovaj proces, i to pismom koje će uputiti Vijeću ministara BiH i OHR-u.

“Postigli smo dogovor među onim stranama koje su prisustvovala današnjem sastanku. Ali nismo postigli napredak, zbog

nedostatka ozbiljnosti onih stranaka koje danas nisu poslale svoje predstavnike. Ovo je veoma zabrinjavajuće ako uzmemo u obzir činjenicu da je sporazum o restrukturiranju policije uslov za početak procesa stabilizacije i pridruživanja," izjavio je visoki predstavnik.

"Oni koji smatraju da je provođenje sitne opozicione politike važnije od budućnosti ove zemlje u Evropskoj uniji ne mogu biti ozbiljna opoziciona stranka. Ukoliko ne dobijemo ova pisma, dalji napredak neće biti moguć," dodao je visoki predstavnik.

On je također istakao da pismo očekuje i od PDP-a, u kojem će čelnici ove stranke pojasniti njen stav te izraziti svoje opredjeljenje za dalje učešće u razgovorima u septembru. Visoki predstavnik je rekao kako nije spreman pokrenuti razgovore o restrukturiranju policije u septembru osim ako tom sastanku ne budu prisustvovali lideri svih političkih stranaka koji su učestvovali u pregovorima na Vlašiću.

"Veoma je značajno da očuvamo proces koji je započeo na Vlašiću. Nijedna zemlja koja je ušla u Evropsku uniju u proteklih nekoliko godina nije to mogla učiniti bez političkog koncenzusa između svih stranaka o pitanjima koja su od ključnog značaja za dalji napredak na putu ka članstvu u EU. Moramo izgraditi koncenzus između političkih stranaka, imajući pri tome na umu da bilo koji prijedlog u konačnici mora biti odobren od strane parlamenata," izjavio je visoki predstavnik.